

Visoki predstavnik Miroslav Lajčak Novi početak za BiH

Karadžićeva sloboda bila je uvreda pravdi
• Pozitivni efekti za evropske integracije u BiH,
smatra šef OHR-a

Iako su preostala dva optuženika Ratko Mladić i Goran Hadžić još na slobodi, hapšenje Radovana Karadžića može se posmatrati kao početak kraja najtragičnijeg poglavlja u savremenoj historiji Bosne i Hercegovine. Ovo je jučerašnja reakcija visokog predstavnika za BiH i specijalnog predstavnika Evropske unije Miroslava Lajčaka, koji je naglasio da, iako je pravda u slučaju Karadžića zakasnila, ipak nije uskraćena.



Okrenuti se ka budućnosti

"Karadžićeva sloboda je predstavljala uvredu pravdi kao i izazov za domaće i međunarodne pravne sisteme, ali pravda je konačno zadovoljena i stvari će sada teći svojim tokom – a to je pitanje od najvećeg političkog značaja i poštovanja ne samo za građane BiH već za sve nas", kazao je Lajčak.

Ambasador Lajčak opisao je Karadžićevo hapšenje kao "pitanje integriteta vladavine zakona" te je naglasio kako će to dati "novi poticaj dugotrajnim procesima poslijeratnog oporavka i evropskih integracija u cijeloj regiji. Zvaničnici Evropske unije već su najavili da će hapšenje Karadžića imati pozitivne efekte na cijelu regiju u vezi sa procesima integracija u EU."

Visoki predstavnik i specijalni predstavnik EU je istakao da je BiH u 2008. sasvim drugačija zemlja u odnosu na ono što je bila 1996, kada se Karadžić počeo skrivati.

"Hapšenje Radovana Karadžića će pomoći građanima Bosne i Hercegovine da se okrenu od prošlosti ka budućnosti i fokusiraju na izazove sa kojima se suočavaju danas", zaključio je Lajčak.

Ambasador SAD-a Charles English

Korak na putu ka pomirenju

Politički lideri ove zemlje imaju odgovornost da podrže, i politički i finansijski, institucije na državnom nivou, zadužene za istraživanje, procesuiranje i suđenje ratnim zločincima

Ambasador Sjedinjenih Američkih Država u Bosni i Hercegovini, u ime Ambasade SAD-a u Sarajevu, pozdravlja hapšenje optuženog ratnog zločinca Radovana Karadžića. Ova akcija pokazuje, kaže se u saopćenju iz Ambasade SAD-a, da niko nije izvan dosega pravde.



English: Političari moraju snositi odgovornost za izjave

"Iako se predugo čekalo na to, hapšenje Radovana Karadžića predstavlja ključni trenutak za pravdu za žrtve zločina počinjene u BiH i važan je korak na putu pomirenja u ovoj zemlji", kaže ambasador English, te dodaje da, iako je hapšenje Karadžića važan korak, pravda i pomirenje u BiH zahtijevaju mnogo više.

"Politički lideri ove zemlje imaju odgovornost da podrže, i politički i finansijski, institucije na državnom nivou, zadužene za istraživanje, procesuiranje i suđenje ratnim zločincima. Politički lideri iz svih etničkih grupa, također, imaju odgovornost da svojim izjavama i postupcima iskreno govore o prošlosti, da pomognu zacjeljivanje rana iz rata i da grade mirnu, prosperitetnu budućnost za sve građane BiH", kaže se u saopćenju iz Ambasade SAD-a, uz dodatak kako pravda zahtijeva da svi optuženi, prije svega, dvojica najozloglašnijih haških optuženika Ratko Mladić i Goran Hadžić moraju odmah biti predati Haškom tribunalu.

Radovan Karadžić: Od manastira do privatnih ordinacija

Ratni zločinac pod plaštom lažnog imena

Karadžić se slobodno kretao gradom. Pojavljivao se na javnim mjestima, a stanodavci koji su mu iznajmljivali stanove nisu znali o kome se radi, kazao tužilac Vladimir Vukčević • Pisao za magazin Zdrav život • Pao zbog Župljanina • Advokat demantira navode srbijanskog pravosuđa, te navodi da su Karadžića presrele i otele nepoznate osobe 18. jula

Almir ŠEČKANOVIC

(a.seckanovic@oslobodjenje.ba)

Ratni zločinac Radovan Karadžić uhvaćen je u ponedjeljak navečer dok je pokušavao promijeniti lokaciju svog boravka, te iz stana u Novom Beogradu preseliti u beogradsko naselje Batajnicu. Ovo su na jučerašnjoj konferenciji za medije potvrdili Rasim Ljajić, u svojstvu Koordinatora tima za saradnju sa Tribunalom, i glavni srbijanski tužilac za ratne zločine Vladimir Vukčević.

Alternativna medicina

Oni su naglasili da je cjelokupna akcija započela u poslijepodnevnom satima, a okončana je hapšenjem Karadžića, koji je posjedovao ličnu kartu na ime Dragan Dabić.

„Radovan Karadžić je koristio lažno ime i identitet. Bio je vrlo uvjerljiv u skrivanju svog

On je uhapšen u autobusu linije 83, koja saobraća od Novog Beograda do Batajnice. No, nije pokušao promijeniti stan. Karadžić je krenuo u jednu banju izvan grada. Tu su ga presreli, tvrdi Svetozar Vujačić

identiteta. To govori činjenica da je radio i bavio se alternativnom medicinom u jednoj privatnoj klinici u Beogradu. Posljednje mjesto prebivališta Radovana Karadžića bila je općina Novi Beograd", kazao je Ljajić.

No, kako saznajemo, to posljednje mjesto prebivališta pripadnici Bezbjednosno-informativne agencije (BIA), koji su i uhapsili najtraženijeg ratnog zločinca, locirali su prilikom nedavnog hapšenja Stojana Župljanina u Pančevu. Zatim je locirana osoba sa identitetom Dragan Dabić, inače ljekar koji je posljednjih nekoliko godina radio u beogradskim ordinacijama alternativne medicine, te objavljivao radove u stručnom magazinu Zdrav život.

POSJETA PORODICE I POMOĆ ČAVOŠKOG

Advokat Svetozar Vujačić jučer je zajedno sa Lukom Karadžićem, Radovanovim bratom, posjetio branjenika. U razgovoru za naš list istakao je da bi ga u narednih nekoliko dana mogla posjetiti i supruga Ljiljana, kao i ostali članovi porodice. No, nezvanično saznajemo da bi advokatski tim Karadžića mogao pojačati i zaštitnik njegovog lika i djela advokat Kosta Čavoški.



Hapšenje četiri dana nakon Bulatovićeve smjene s čelnog mjesta BIA

Promjena na čelu BIA, za čijeg je direktora prije četiri dana izabran Saša Vukadinović umjesto Rade Bulatovića, rezultirala je prestankom podrške Karadžiću

„On se slobodno kretao gradom. Pojavljivao se na javnim mjestima, a stanodavci koji su mu iznajmljivali stanove nisu znali o kome se radi. Uhapšen je u okolini Beograda. Čekali smo da se premjesti sa jedne lokacije na drugu", pojasnio je tužilac Vukčević.

Većinu stvari rečenih na ovoj konferenciji Karadžićev advokat Svetozar Vujačić je demantovao. On je u razgovoru za Oslobođenje izjavio da su „nepoznate osobe tri dana protuzakonito držale Karadžića na nepoznatoj lokaciji". Naime, prema njegovim riječima, zločinac je uhapšen 18. jula 2008. u večernjim satima, a pred istražnog sudiju je doveden tri dana kasnije. Zbog svega toga najavljena je i krivična prijava protiv „nepoznatih osoba".

„On je uhapšen u autobusu linije 83, koja saobraća od Novog Beograda do Batajnice. No, nije



Luka Karadžić ispred beogradskog suda/zatvora

ŽALBA U ROKU OD TRI DANA

Istražni sudija Vijeća za ratne zločine Srbije Milan Dilparić donio je odluku o izručenju Radovana Karadžića u Haški tribunal. Prilikom saslušanja Karadžiću je uručena optužnica, no on je nije komentarisao. Odbrana ima pravo na žalbu u roku od tri dana. O žalbi odlučuje Vanraspravno vijeće Okružnog suda u Beogradu.

Prije hapšenja je posljednji put viđen jula 1996. u Han-Pijesku. Za razliku od tada, danas zločinac ima dužu bradu i kosu koju je vezao na vrhu glave. Često je nosio crninu i ponašao se kao boem. O politici nikada nije pričao

pokušao promijeniti stan. Karadžić je krenuo u jednu banju izvan grada. Tu su ga presreli i smjestili na nepoznatu lokaciju. Danas je on u odličnom zdravstvenom stanju. Prilikom saslušanja se branio šutnjom jer naprosto zna da je uzaludno da bilo šta priča. S druge strane, dobio sam rješenje o izručenju, ali mislim da to neće ići tako lagano. Žalbu ću uložiti tek u petak, tako da će izručenje biti tek naredne nedjelje", kazao je Vujačić.

Zaštita obavještajaca

I on nam je potvrdio podatak da je nekadašnji lider bosanskih Srba već nekoliko godina stanovao u Novom Beogradu.

Kako saznajemo od izvora bliskih operaciji koja je rezultirala akcijom hapšenja, Karadžić je u Beograd došao prije nekoliko godina. Prije toga je bio čest gost manastira pod kontrolom pojedinih vladika Srpske pravoslavne crkve (SPC). No, ta podrška je prestala padom režima Slobodana Miloševića. Od tada se Karadžić nalazio pod zaštitom obavještajnih službi. Promjena na čelu BIA, za čijeg je direktora prije četiri dana izabran Saša Vukadinović umjesto Rade Bulatovića, rezultirala je prestankom podrške Karadžiću.

Prije hapšenja je posljednji put viđen jula 1996. u Han-Pijesku. Za razliku od tada, danas zločinac ima dužu bradu i kosu koju je vezao na vrhu glave. Često je nosio crninu i ponašao se kao boem. O politici nikada nije pričao.

Kako saznajemo od izvora bliskih operaciji koja je rezultirala akcijom hapšenja, Karadžić je u Beograd došao prije nekoliko godina. Prije toga je bio čest gost manastira pod kontrolom pojedinih vladika Srpske pravoslavne crkve (SPC). No, ta podrška je prestala padom režima Slobodana Miloševića

BLIC KOMENTAR

Šansa za Srbiju

Predrag Matvejević



Događaj je potresao ne samo sve nas, stanovnike sad već bivše Jugoslavije. Svijet se ponovo osvrće na ovaj prostor, pogledom koji očekuje da se učini ono što je odavno trebalo učiniti. Što učinjeno nije.

Svatko je od nas dužan pogledati se u ogledalu povijesti, bliže i dalje. Uпитati se što smo učinili drugima i samima sebi, što su nama drugi učinili, za što smo sami krivi, a za što nismo. Primjer koji je s mukom pružila Njemačka poslije Drugoga svjetskog rata - zemlja stare i značajne kulture u kojoj je zločin uspio zagušiti kulturu - valjalo bi da nam bude pred očima. Italija nije imala svoj nirnberški sud - i to je vjerojatno jedan od razloga što smo nedavno mogli opet vidjeti crnokošuljaše s rukama dignutim uvis na rimskim trgovima. Za istupe slične onima koje gledamo na raznim stranama posljednjih godina u Njemačkoj bi intervenirala pravda ne plašeći se pamćenja.

U nas nije tako. Svatko pamti tuđa zlodjela, a nastoji izbrisati svoja.

Uhićenje Radovana Karadžića zatječe Srbiju u tešku času - kad Tadićeva vlada traži s mukom minimalnu stabilnost kako bi se održala i nastavila djelovati. Nastojeći izbjeći da se vrati na scenu Koštuničin tip klerikalnoga nacionalizma, nedostojan modernoga društva. Ali za ovakve događaje možda i nema lakih časova. Nacionalisti će sve učiniti da opravdaju zločinca. Ponavljat će tko zna po koji put kako su i drugi činili zločine nad Srbima, kao da jedan zločin može opravdati drugi. Miloševićevi sljedbenici, koji su kadri pomaknuti jezičak na vagi, trebali bi se sjetiti da se i sam Milošević pravdao ističući da su u Bosni Karadžić i Mladić činili bez njegova znanja i privole velik dio onog što su činili - što mu je štetilo pred svijetom kao vođi Srbije i predvođniku srpstva.

Srbija na Istoku u ovoj prilici ima, uza sve teškoće, jednu posebnu šansu: da pokaže koliko je zrela, zrelija od drugih, možda i od sebe same.

Vijeće ministara EU Doprinos miru i stabilnosti na Balkanu

Zekerijah SMAJIĆ

"Vijeće ministara Evropske unije pozdravlja hapšenje Radovana Karadžića, optuženog za genocid, zločine protiv čovječnosti i druge ratne zločine. Takav razvoj događaja podražava spremnost nove vlade u Srbiji da doprinosi



Solana: Jako dobre vijesti iz Srbije

trajnom miru i stabilnosti na cijelom balkanskom području, što predstavlja vrlo značajan korak na srbijanskom putu prema Evropskoj uniji", navodi se u zaključcima Ministarskog vijeća na nivou šefova diplomatije, koji su usvojeni bez posebne rasprave o Balkanu.

U zaključcima se dalje navodi da Ministarsko vijeće "ohrabruje novu vladu Srbije da nastavi istim putem naprijed ka evropskim integracijama".

Vijeće ministara, također, podsjeća na zaključke šefova država ili vlada EU od 19. i 20. juna ove godine, kada je odlučeno da "Srbija može značajno ubrzati vlastiti put ka evropskoj uniji, uključujući i sticanje statusa kandidata, kada za to budu ispunjeni određeni uslovi".

Ministri su pozdravili nastavak dijaloga između Evropske komisije i Vlade u Beogradu u vezi sa liberalizacijom viznog režima, te pozivaju novu vladu Srbije da se u potpunosti fokusira na primjenu kriterija koji su utvrđeni smjernicama, odnosno mapom puta za postepeno ukidanje viznih ograničenja.

"Mislim da je hapšenje Karadžića vrlo dobra vijest. Bilo bi veoma važno da se ovaj haški optuženik što prije pojavi pred Međunarodnim sudom za ratne zločine u Hagu, gdje će mu se suditi fer i na pošten način", izjavio je visoki predstavnik za zajedničku vanjsku politiku i sigurnost Havijer Solana uoči današnjeg zasjedanja ministara vanjskih poslova Evropske unije.

Evropska komesarka za međunarodne odnose Benita Ferrero - Valder je mnogo određenija:

"Ovo je, u svakom slučaju, vrlo važno korak kojim je nova vlada Srbije potvrdila svoju opredijeljenost ka evropskim integracijama. O tome ćemo danas sigurno razgovarati kako bismo zajednički dogovorili koji je naš naredni korak", izjavila je Benita Ferrero - Valdner.

Ignacio Martin Villalain, komandant EUFOR-a Vrlo važan tren za Balkan



Komandant Villalain

Komandant EUFOR-a u BiH general-major Ignacio Martin Villalain pozdravio je hapšenje Radovana Karadžića, te čestitao na akciji srbijanskim vlastima riječima:

- Ovaj trenutak je važan za pravdu, za BiH, ali i za širu balkansku te međunarodnu zajednicu.

Prema njegovim riječima, a kako je saopćio EUFOR, ni ne treba sumnjati da su se preostali bjegunci, Ratko Mladić i Goran Hadžić, našli izolirani, sa sve manje mjesta za skrivanje i sve manje ljudi koji su im spremni pomoći, uključujući i područje Srbije.

Komandant Villalain je podsjetio da je EUFOR 15. jula vodio operaciju pretresa kuće porodice Karadžić, prilikom koje je, a kako doznaje Oslobođenje, tražen dokaz o suvlasniku ovog objekta, što je bio jedan od prijeko potrebnih tragova za lociranje Karadžića.